

Uunga siunnersuut: Suliffissarsiornermut ikorsiissutit pillugit Inatsisartut inatsisisaaat aamma uunga siunnersuut: Pisortanit ikorsiissutit pillugit Inatsisartut inatsisisaaattut siunnersuut

(Isumaginninnermut, Suliffeqarnermut Nunamullu Namminermut Naalakkersuisoq)

Saqqummiussinermut allakkiaq

(Isumaginninnermut, Suliffeqarnermut Nunamullu Namminermut Naalakkersuisoq)

Siullermeerinninneq

Naalakkersuisut matumuuna saqqummiuppaat suliffissarsiortunut ikorsiissutit pillugit Inatsisartut inatsisisaaattut siunnersuut aamma Pisortanit ikorsiissutit pillugit Inatsisartut inatsisisaaannut siunnersuut.

Siunnersuutit taartaasussapput maanna malittarisassanut suliffissarsiortunut ikorsiissutinut aamma pisortanit ikorsiissutinut, kaammattutaassallutillu innuttaasut suliffissarsiormanerulernissaannut, pitsangorsaassallutillu innuttaasut atugaasa pitsangorsarneranni siunnerfilersorneqarnerannilu.

Siunnersuutit aaqqissusseqqinnermut pisortanit ikorsiissutinut malittarisassanik aamma suliffeunnermi ikorsiissutinut / suliffissarsiortunut ikorsiissutinik suliaapput Naalakkersuisut naalakkersuisoqarfinni suliassaqarfiiit akimorlugit suleqatigiisitami nunatsinni imminut pilersortuunerup annertunerulersinnissaanik siunnerfeqarnerup ilaatut, ersarissunillu anguniagaqarlutik, suliffissaaleqisut tamarmik imminut pilersorsinnaanermik akisussaaffeqarsinnaanerulernissaannut.

Maannamut atuuttunut malittarisassanut sanilliullugit tunngaviusutigut allannguutit tassaassapput suliffissaaleqisup siunissami suliffissarsiornermut ikorsiissutinut innersunneqartalernissaa imaluunniit pisortanit ikorsiissutinut innersunneqartalernissaa, apeqquaatillugu sulisinnaassuseqarneq sapaatip akunneranut sivikinnerpaamik akunnerni 20-ni. Tassa imaappoq suliffissaaleqisoq sulileriaannartut isigineqarnersoq apeqquaatillugu.

Maannamut sulinerrik inuussutissarsiuteqartut nammieq pisuussutiginngisamik suliffissaaleqisut il.il. pisinnaatitaagaluarput suliffeunnermi ikorsiissutinik sap. ak. 13-it angullugit.

Suliffissarsiortunut ikorsiissutit nutaat piffissamut killiligaassanngillat, piumasarneqanngilarlu suliffissaaleqisup sulinerrik inuussutissarsiuteqartuunissaa. Taarsiullugu piumasaqaataavoq suliffissaaleqisup sulileriaannaanissaa.

Suliffissarsiornermut ikorsiissutit annikillineqartassapput apeqquaatillugu qanoq sivisutigisumik suliffissarsiortuusimaneq. Tamanna isumaqarpooq suliffissaaleqisut sulileriaannaat pisortanit ikorsiissutinik qinnuteqartariaqassanngitsut, taarsiulluguli siunnerfilersugaasumik sullinneqassallutik Majoriaq aqqutigalugu, suliffissarsinissamik siunertaqartumik.

Pisortanit ikorsiissutit pilersorermut atorneqartussat maannamut annertussusilerneqartaruarpuit pineqartup inuup pisariaqartitsineranik nalilersuinermik tunngaveqartunik. Taamaattumillu kommunimiit kommunimut pisortaniit ikorsiissutit assigiinngitsorujussuusarsimallutik.

Siunissami pisortanit ikorsiissutinik pisartagaqartut ikorsiissutinik annertussusileriikkaniq pisartagaqartinneqartalissapput, nammineq aqtassaminnik. Tamatuma qularnaassavaa kikkut tamarmik Inatsisartut inatsisaat naapertorlugu naligiissinneqarnissaat, pisortaniillu ikorsiissutinik pisartagaqartut aningaasaqarnerminnik nammineq aqtsinerat annertunerulissasoq.

Kommune taamaallaat pisussaaffeqlissaq iliuusissanut pilersaarusiornissamut pisortanit ikorsiissutinik pisartagalimmut sulilernissamut piareersimasungornissamik siunnerfeqartumik, taamalu suliffissarsiortunut ikorsiissutinik pisartagaqarnermut, neriuutigalugu aalajangersimasumik suliffeqalernissaq. Pisortanit ikorsiissutisisartoq ilutigisaanik pisussaaffeqlissaq equeersimaartumik iliuusissanut pilersaarusiornermi peqataanissamut.

Iliuusissanut pilersaarummi pisortanut ikorsiissutisisartup ataatsimut inissisimanera ilaassaaq, pineqartumut namminermut tunngasuussalluni, suliffissaaleqisoq pitsaanerpaamik ikiorneqarsinnaaqqullugu.

Iliuusissanut pilersaarutip ilaatut ingerlaavartumik nalilersuisoqartassaaq pisortanit ikorsiissutinik pisartagallip suliffissarsiortunut ikorsiissutinut nuussinnaaneranik, imaluunniit allatut aaqqissuussisoqartariaqarnersoq, soorlu siusinaartumik pensionisiaqalernissaq eqqarsaatigalugu.

Suliffissaaleqisullu sulileriaannaanersut tunngavigalugit tulluarsaqatigiinnut inissinneqartnerisigut pisortanut ikorsiissutit inuiaqatigiinni sanngiinnerusumik inissisimasunut sammisumik ikorsiissutaasinnaapput.

Pisortanit ikorsiissutit taamaasillutik siunnerfilersorneqarsinnaapput innuttaasunut annertuunik unammilligassaqartunut ikiortariaqartunullu. Assersuutigalugu tassaasinnaavoq atornerluisuuneq, tarnikku imaluunniit inooqataasutut allatigut ajornartorsiuteqarneq, innutaasup nalinginnaasumik suliffeqarsinnaannginneranut pissutaasoq.

Paarlattuanik suliffissaaleqisut sulileriaannaasut suliffissarsiornertik aallussinnaavaat, pikkorissaqqissinnaallutik ilinniaqqissinnaallutilluunniit, tamarmik aqutissiuusseqataasussat piginnaaneqarnerulernissamut aalajangersimasumillu suliffeqalernissamut.

Siunnersuutit siunertaraat inuiaqatigiinnik imminut napatissinnaasunik pilersitsiartuaarneq, amerlanerusut suliffeqarnerisigut taamalu inuiaqatigiinnik pilersueqataanerisigut, ilutigisaanillu suliffissaaleqisut tamarmik imminut pilersortuulernissamut periarfissaqartinnerisigut.

Taamatut oqaaseqarlunga oqaluuserisassaq Inatsisartunut suliassanngortippa.